



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 6 Yangia anidakangma : Tir Yimyim tiryimyim@aolima tir yimyim TAPAK 8

Guwahati nung ano flyover
6 yanglutsü: Assam CM

Federico Gatti-i Juventus den
tenangzüktepba yanglushi



VOL. XXI NO. 19 (ADOK 19) DIMAPUR ROGONÜ (FRIDAY) MONGPUTENI (OCTOBER) 27, 2023 ₹ 5.00

Longkak aittsü mechi kaketshirtemi Hokulbar shia sodi meshir

Imphal, Mongputeni/Oct. 26 (Agencies): Manipur nung Joint Students' Body of Lamka ajanga iba jila nung aliba sorkar reju ajanga dang Hokulbar shia sodi alitsü akhanger.

Iba kaketshir tentet ajanga sangdong ka nung ashiba agi, ibai Manipur nung state sorkari yaria kin samatsütsü merangba anema lir.

Tang mepetmesü adoka aliba ajanga Lamka nung maparen ajak nung kongshiogo, ta Joint Students' Body ajanga ashir.

"Linük asoshi asür nisung tasü mang meremi Lamka Medical College, RIMS, JNIMS aser Imphal Valley nung danga mozüki tem nung aliba den ano nisung tasü aika mejangjateti lir aser aremtsü asoshi pei aliba tesemi bener marui lir. Tang onok takum jenbua alitsüba tensa tia nung lir, kechiaser danga lenmang kecha mali saka alima nungi onok samatsütsü merangba nungi onok sasa kumzüksüba dang lir," ta sangdong ajanga ashir.

Nisung aika tepsetogo aser aika pei kidang nungi tesem balala nung jenoka lir ta ashir.

Sorkari iba azüdokshi

mazüoktet aser tangbo par molungba nung inyaker, ta ashi.

Sorkari mapa shidak meinyakba anema nokdakba temaitsü ka ama kaketshir temi hopta nung anogo ka sodi ya akhanger.

Centre aser Manipur nung aliba sorkar nem angashidaksütsü aser N. Biren Singh kübok Manipur sorkar anema nokdakba ama Joint Students' Body, Lamka ajanga August 18, 2023 nü pangzüng ka renema jila nung sorkar school/college densema Manipur sorkar indang reju ajanga nung Hokulbar shia sodi alitsü lemtet," ta ashi.

Lamka nung aliba nüburtem temeden wazüka ayutsü aser azüdokshiba anentsü asoshi sorkari mera magi tashi maneni longkak aittsü, ta parnoki ashi.

Nüburtem ajungtsü mechi ketdangsur ajungai iba "Standing Resolution" sülen anidaksü ayongzüker, ta ashi.

Onoki akhangba sülen manidakra, menüngdakba nung lendong timtem ajurutsü aser ibaji ajanga jila aser temeket nung alirtem akoksatsü, ta kaketshir tentet ajangasa ashir.

HE tesayurtem Curriculum Development training tenzükogo



Kohima, Mongputeni/Oct. 26 (TYO): Higher Education Teachers asoshi Curriculum Development nung hopta ana capacity sentong Nagaland University, Meriema Campus nung October 26, 2023 nü tenzükogo.

Iba sentong nung jembidang Pro-Vice Chancellor, Nagaland University, Prof. Dr. G. T. Thong-i ashiba agi, lesson angazükba nung kaketshirtem shilem agiba, teblemtsü balala koktetba skills sayuba aser kaketshirtem jembishiniü tajungba kumdaksüba nung rangloker lenla asem - learner centred, traditional subject centred aser problem centred nung ajemdaker curriculum yanglutsüla.

Dean, School of Humanities and Education, Dr Jano Legise ajanga pela agizükba o jembidang, iba sentong ayongzüka asoshi tenüngsang agütsü aser shilem agirtem dang academic tsütsü tesendaktep yangertsü asoshi inyaksü aser tejangraba aser temolungtetba tulu nung mera

agütsü ayongzüka liasü.

Programme Director Dr Sushil Kumar Singh-i iba sentong indang omen rateta jembiba mapang, loktiliba nung tesayur temi tongti shilem agiba indang rasaa ashi aser putu tasen tajungtiba nung anitetsü asoshi mezüngbuba nung tesayurtem tensa den apert meteta alitsü nüngdaker, ta ashi.

Iba sentong nung menden ya Assistant Professor of Teacher Education, Dr T Yolila Sangtam liasü aser Dr. Pradipta Kumar Pattnaik-i melepzüng o jemi aser Head of Department, Prof. Dr. Gyanendra Nath Tiwari-i tepela o jembiba liasü.

Hopta ana sentong nung curriculum development atema tesayur nem nüngdakba shisatsü aser skills agütsütsü. Iba sentong nung shilem agirtemi angatetba aser ajangshibatem linük tesem ajungalen lemsateptetsü akok.

Tanü tensa den apert curriculum yangertsü asoshi iba sentong nung shilem agirtem nem training agütsütsü.

Palliative care tsütsü mongintem sensaksem aka



Palliative Care Nurse & Director, Cancer Relief India, Gilly Burn-i October 25, 2023 nü Kohima semdangba mapang H&FW Department indang Principal Director, Dr. Ritu Thurr aser ketdangsurtem den külemi tangokba noksa nung angur.

Dimapur, Mongputeni/Oct. 26 (TYO): Gilly Burn, Palliative Care Nurse & Director, Cancer Relief India, aser Rontu Sangma, Regional Facilitator for Northeast and East overseeing palliative care programs nungertem densema palliative care nung tongtipang nisungtem senden ka Kohima nung October 25, 2023 nü mena liasü. Iba senden nung tongtipang onük balala jembiba liasü.

Iba senden nung Pallium India den lungjemer Kohima aser Dimapur nung Pilot Palliative Care Project ka tenzükdangtsü indang jembiba liasü. Region nung palliative care services tajungba kumdaksütsü nükjidong nung

iba project ya yangluba lir. Iba proposal ya ano tali tajungba nung asadangtsü asoshi ketdangsur nem agütsütsü. Iba senden nung medical college tem nung nursing education atema jemi aser Gilly Burn-ia lai atongba lemsatepa liasü. Palliative care nursing aser education tsütsü la ya takoktet lir, aser la ajanga nursing students indang curriculum aser training tajungba kuma aotsü.

Healthcare nung mongintem aser shirangertem tsüngta tesendaktep tajung alitsü kanga tongtipang ta ajiteta iba senden nung doctor aser nurse tem

jembishinüba nunga tajungba akumtsü nüngdaker ta jembiba liasü.

Iba senden nungya Commissioner Secretary, V Kezo; Principal Director, Dr. Ritu Thurr; Managing Director, NHM, Dr. E Motsuthung Patton; SPO of palliative care Nagaland, Dr. H Sema aser retired Joint Director, H&FW Department, Dr. Obangjungla nungertem dena liasü.

Kasa mapang parnoki NHAK semdanga MD, Dr. Sendimeren Aonok aser ketdangsurtem ajurua palliative care services tajungba kumdaksütsü asoshi jembishinüba liasü.

Kasa mapang parnoki NHAK semdanga MD, Dr. Sendimeren Aonok aser ketdangsurtem ajurua palliative care services tajungba kumdaksütsü asoshi jembishinüba liasü.

State nung temesepba mozü achi-ajemertem züiner

Kohima, Mongputeni/Oct. 26 (TYO): Tanü lokti nung mapa tamajung inyakba aser temesepba mozü achi ajemer tali akumba khuret angateta Kohima district kübok Child Care Institutions, DCPUs aser lokti tentet balala asoshi anogo ka Awareness Seminar on Substance Abuse sentong Department of Social Welfare ajanga Hotel Ura, Kohima indang Conference Hall nung October 26, 2023 nü agüja liasü.

Iba sentong nung shisalen sayur ama jembidang, tanur arishi küm 12/13 nungi tenzükba aser college-i aoba kaketshirtem uniform nung temesepba mozü chia-jemer senzür aser 'addiction' ya temesepba mozü ka dang masü, ta ARK Foundation nungi Ketho Angami-i khuret lemsatepa liasü.

Temesepba mozü/yi lar ya teti alitsü aser aji samatsütsü kanga tasak alitsü, kechiaser item machi-majemtsü shishilempar jenti lir aser state nung tesem balala nungi aita meta talangtiba

nunga danga oset agi metongtetaka temesepba mozü agi atonger, ta pai ashi.

Ajem mamshiaka temesepba mozü amshir tali kumogo aser temesepba mozü amshirtem ya teburtem kisüng masü tetstürtema lir, ta ashi.

Iba asoshi pai temesepba mozü anema tali asendenshir raratsü nüngdakba shia liasü.

Pai de-addiction asoshi ajangshiba aser timtemba lemsatep aser de-addiction asoshi lenmang tatsüba mali, ta Angami-i ashi.

Nisung 61,000 asoshi teyari sen crore 6.13 agütsügo: Manipur CM

Imphal, Mongputeni/Oct. 26 (Agencies): Mepetmesü adokba ajanga relief camp tem nung aliba nisung 61,000 dak tema nem teyari agütsütsü asoshi sorkari deputy commissioner tem nem sen crore 6.13 dak tema lemshtüsügo, ta Manipur Chief Minister N Biren Singh-i Bodhbarnü ashi.

Asükwa arudang aben-süoshi aser osettsüset alitsü atema item senotsü teyari ya agütsü, ta pai ashi.

Relief camp tem nung alir shia nem sen 1,000 agütsütsü, ta chief minister-i ashi.

"DCs tem ajanga relief camp tem nung alir nisung shia nem sen 1,000 agütsütsü aoshi October 24, 2023 nü senotsü lemshigo. State nung mongpu aruba mapang pei ki yutsür tesem balala nung prokshia aliba nüburtem aben-süoshi aser osettsüset aliba nung yaritsü asoshi item teyari ya agütsü," ta Singh-i ashi.

Tang state nung relief camp tem nung aliba nisung 61,387 nem teyari agütsüba nung amshits asoshi DCs dangi sen crore 6.138 yokogo, ta ashi.

Koba kin nungi südir süaka state sorkari timtem ajurua alirtem nem teyari maneni agütsütsü, ta Manipur chief minister-i ashi.

Relief camp tem nung aliba kaketshir shilem 98.28 bo anasa aliba school tem nung tanaben admisssion agiba asoshia pai pelaba lemsatepa liasü.

"Department of Education ajanga relief camp shia nodal officers shima lir aser department-i control room ka lapoka kaketshirtem nüngdakba indang osang anogoshi bendener," ta Singh-i ashi.

Meitei nungeri Scheduled Tribe jenjang meshiba anema hill district tem nung May 3 nü Tribal Solidarity March ka ayongzüka azüdokshi tenzükba sülen

nunga danga oset agi metongtetaka temesepba mozü agi atonger, ta pai ashi.

Ajem mamshiaka temesepba mozü amshir tali kumogo aser temesepba mozü amshirtem ya teburtem kisüng masü tetstürtema lir, ta ashi.

Iba asoshi pai temesepba mozü anema tali asendenshir raratsü nüngdakba shia liasü.

Pai de-addiction asoshi ajangshiba aser timtemba lemsatep aser de-addiction asoshi lenmang tatsüba mali, ta Angami-i ashi.

Manipur nung nisung 180 dak tema takum samaogo.

Bodhbarnü Singh-isa 'Meri Maati Mera Desh' campaign nung shilem ka ama linük yimtiba bushia aoba 'Amrit Kalash Yatra' tenzükja liasü.

Iba sentong asoshi züngsem 15 agi kumtetba team ya bus nung mener Delhi-i aotsü.

'Amrit Kalash Yatra' kübok nüburtemi linük tesem ajungalen nungi urns 7,500 nung ali bener Delhi nung senteper. Item ali ya National War Memorial anasa 'Amrit Vatika' yangluba nung amshits.

'Amrit Vatika' ya 'Ek Bharat Shrestha Bharat' nung maitsü tongtipang ka asütsü.

CM Secretariat nung osangbener den jembidang, "State kübok district 16 nungi ali bendena lir. Mera Maati Mera Desh asoshi züngsem 15 agi akumba team ka linük yimtibai yoker," ta Singh-i ashi.

Mokokchung Forest Department-i Molulem ozü makatsü nübur dang sangdonger



October 26 nü SBI Mokokchung staff temi kumzükba yirur aliba Amur Falcon ka Mokokchung forest department ketdangsürtem nem agütsüba noksa nung angur.

Mokokchung, Mongputeni/October 26 (TYO): Mokokchung Forest department ajanga sangdong ka nung tang mapang nungya Nagaland-i Molulem ozü (Amur Falcon) arua asen lima nung amongtsü tenzükogo, anungji iba ozü ya nüburtemi makatsülata metetdaksüogo. Iba Molulem ozü ya bendang lima talang nung kilometer 22,000 tashi yima Asia anüdoklen nungi arua asen lima nung mongzükör meyipa aor. Molulem ozü telok ya lakh 1 shi asen limai arur aser parnok yangi anisüngzuka

mongzükba ajanga asenoki tajangzük tuluka agiteter. Parnok arua mongzükba ajanga asen lima tzu mupong merüka yutsür aser ibala ama tajangzük aika agiteter. Nagaland ya alima nung Molulem yimti ta (Amur Falcon capital of the world) ta alimai meteta kumogo. anungji iba ama konang tenung tulu ngutetba aser tajangzük angubaji meteta state sorkaria Molulem ozü makatsü aser parnok tiptema lidaktsüsü asoshi sentong balala atonger. Kasa sangdong nungsa ashiba agi shirisa ozü sangnu kah-a shi chidir parnokji

Wildlife (Protection) Act 1972 temzüng nung aliba ama temerenshi kum asem tepuokdak ayutsü. Aji asünung senso ajaki tangatetba tajung agi asen lima nung asen limai Molulem arubaji meima anepalua mongdaksüdata nübur dang Mokokchung Forest department ajanga sangdong ajanga lemsatöp. Kasa sangdong nungsa State Bank of India Mokokchung nung inyaker staff-temi manemi aliba Molulem ozü ka pur anepalutsü asoshi forest department nem agütsüba kasa sangdong nungsa metetdakja liasü.

NSCN-R züngsem ka bendanga agütsü



Dimapur, Mongputeni/October 26 (TYO): NSCN-R (Reformation) züngsem ka October 25 nü Mon distric

kübok Aboi jila nung Assam Rifles nem bendanga agütsüogo. Paisa, pistol (mag dena) ka den injang 10 tashi bendanga agüja liasü. Bendanga agütsüba telungpur ya iba tesem nung rakzükkrakdemba maparen balala nung shilem agia liasü. Security Forces temi ita ishi ka pa bendanga agütsüsü asoshi ajungshia arur tang bendanga agütsüogo.

Assam: Dhemaji nung apu ka chirepa kaketshir 20 dak tema yiru

Guwahati, Mongputeni/October 26 (Agencies): Assam kübok Dhemaji district nung ayonga ka temdanga yangluba au apu ka chirepa sülen school-i oya aliba kaketshir 20 dak tema yirua liasü. Iba lendong ya Dhemaji

district kübok Chahbari nung Brehostibar (October 26) anepdang ataloka liasü. Kaketshirtem parnoki school-i aodang apu ajanga aotsü merangba mapang apu ya chirepa liasü. Kaketshirtem asatöpba ola angashiba sülen iba tesem nung

alirtem aritepa ao aser tanurtem kumzükba liasü. Osang ajanga ashiba agi yirur aliba kaketshirtem pongubo temang kanga mejungi lir. Yirur aliba kaketshirtem ajak ya Dhemaji civil hospital nung tang temang anepaludar, ta osang ajangasa metetdaksü.



Mokokchung nung aliba Straightway Hr. Sec. School pur 'Parents Day cum Foundation' sentong Oct 26 nü "Embodiment of Love" omen dak rangloker Mokokchung town hall nung akadang kaketshir telok kati shilem agidang tangokba noksa nung angur. Mokokchung Town Baptist Arogo, Pastor, Rev. Ponen Longchar-i omen nung ajemdaker Tsüngrem o tulu lemsatöp. Yangji azünger kaketshirtemi kentenmenü aser jilushi tapu balala ia sayuba ajanga tesentepertem kanga longsodaktsü. Mokokchung, 26th October, 2023

Kohima District kübok Polling Station list sangdongogo

Dimapur, Mongputeni/October 26 (TYO): Deputy Commissioner & District Election Officer, Kohima office-i sangdong ka ajanga Kohima District kübok Polling Station tem rationalization dak sendakba nung nüburtem nem osang ka metetdaksüogo. Kasa sangdong ajanga Polling Station tem indang List ya Annexure IV nung agüja aliba metetdaksüogo. Iba list ya

nüburtemi asadangtsü atema DC indang Office Notice Board nung madakja lir. Annexure IV nung agüja aliba Polling Station tem dak sendakba nung osang tejangjaba agütsü atema tejangrartem dang Deputy Commissioner & District Election Officer, Kohima indang Office nung Election Branch den tongteprateptsü asoshi metetdaksüogo.

CPO sanen luden senden ayonger

Dimapur, Mongputeni/October 26 (TYO): Chakhroma Public Organisation-i sangdong ka ajanga October 31 nü 10:30 ako nungi tenzükba CPO Hall, Chümoukedima nung sanen luden senden amentsü ta metetdaksüogo. Iba senden nung Village chairman mesüra representatives, CWO, CGOK, CYO, CSU, GB densema frontal organizations ketdangpurtem aser iba den

Angami nung lakti tentet balala nungi lenirtem ajaki shilem agütsü asoshi metetdaksüogo. Senden nung taruba Sekrenyi benjung 2024, CPO kum 150 ajungba, CPO inti senden amala sentongtem dak sendakba nung sensak asemtsü. Osang tejangjaba agütsü atema ketdangsürtemi iba number; +91 70059 22992 nung tongteprateptsü asoshi CPO tir Zhato Kimho-i sangdong ka ajanga metetdaksüogo.

NSDMA Orientation & Coordination Conference mapa melenshir

Dimapur, Mongputeni/October 26 (TYO): Nagaland State Disaster Management Authority (NSDMA)-i sangdong ka ajanga, October 20 nü video conference (VC) ajanga Orientation aser Coordination Conference agütsü aliba October 27 nü 11 ako nungi tenzükba 1 ako tashi agütsü ta metetdaksüogo. Video conference atema link ya Department tem indang Disaster Management Nodal Officer ajanga lemsateptsü. Orientation & Coordination Conference ya Maj Gen. SudhirBhal (Reid) Sr. Consultant (MF&IRS), NDMA. MHA. Government of India lenisüba

nung agütsü. Kasa sangdong ajangsa, Nagaland Emergency Preparedness Exercise (NEPEX) 2023 atema jeli sentong ka ama Table Top Exercise October 31 nü 10 ako nungi tenzükba Administrative Training Institute (ATI), Kohima nung agütsü. Iba sentong nung Nagaland Chief Secretary alakteta jaoker asütsü, ta metetdaksü. Line Department tem nungi Disaster Management Nodal Officer tem, AHoD/HoD ajak TTEEx nung tamakok maludaktsüi arua shilem agütsü metetdaksüogo.

Pongo yimdak Nangthu Morung semzük

Dimapur, Mongputeni/Oct. 26 (TYO): Longlen district kübok Pongo yimtsüng nung October 24, 2023 nü MLA A. Pongshi Phom-i Nangthu Morung semzükja liasü. Iba sentong nung tesemdanger tongti A. Pongshi Phom-i sobaliba aser senmang balala wazüka ayutsü nungdakba indang jembi aser sobaliba aser senmang wazüka ayutsü asoshi shisaliok kanga tongtipang lir, ta ashi. Sobaliba senmang angazüksü asoshi 'integrated educational approach' nungdaker ta pai ashi. Shisaliok ajanga sobaliba wazüka ayutsüla aser temaba jenjangi ajungkettsüla, ta MLAA. Pongshi Phom-i ashi. Iba sentong nung Extra Assistant Commissioner, Dr. Samuel Akho Konyak-i jembidang lanurtemi sobaliba wazüka ayuba tajangzük aser jenjang metettsüla, ta ashi. Kechi jenjang nung lidir liaka lokti ka indang sobaliba aser ayak ya tejak tentettsü tera lir,

ta pai ashi. Tanü putu-i tang aliba sobaliba nung akang-akanga soittsüla aser yimchiyimjung asoshi tarutsü putu nem agütsütsüla ta pai ashi. Iba sentong nung T. Lakba, chairman, Pongo Village; Y.L. Anba, chairman, Hongnyu Village aser P. Kangyong, 2nd GB nung temia o tatsütsü jembi liasü. L. Wannu & T. Taukam lenisüba kübok Nangthu lanurtemi ken ka ate maser L. Chingben ajanga iba Morung yangluba osang agüja liasü. Iba sentong nung menden T. Laknyei Phom liasü aser Y. Ashau Phom-i tarur pela agizükba o jembi. H. Aniam ajanga tepela o jembidang sentong nung shilem agir aser iba ki yangluba nung yariteper ajunga dang pelaba lemsatöp liasü. Iba ki ya meshiteta B. Chingmei, Pastor, Pongo Baptist Church ajanga sarasadema liasü.



October 26, 2023 nü New Delhi nung Indian Air Force Commanders' Conference nung Defence Minister Rajnath Singh, Minister of State for Defence Ajay Bhatt, Defence Secretary Giridhar Aramane, Chief of Defence Staff General Anil Chauhan, Chief of Air Staff Air Chief Marshal VR Chaudhari aser commander tem adenba noksa nung angur.

Israel-i India dang Hamas ya kiralongrar telok ta züngshitsü mepishir

New Delhi, October 26 (Agencies): Israel-i India dang linük aikati Hamas ya kiralongrar organisation ka, ta sangdonga nokdangba ama India danga kasaji inyaktsü mepishiogo.

Israel-isa parnoki Hamas anema raraba nung India-i parnok pusemba atema pelaba lemsatep.

Israeli ambassador to New Delhi, Naor Gilon-i, Hamas ya kiralongrar telok ka ama nokdangtsü atema parnoki India den jembio, ta metetdaksü.

Paisa, tesüiba mapang nunga parnoki India den kasaji jembia liasü, ta ashi.

Osangbenertem senden ka

nung jembidang Gilon-i, "Alima nung democracy linük aika onok (Israel) den lir. Parnokji onok atema tongtibang linüktem lir. India-ia official süa Hamas ya kiralongrar telok ka ama nokdangtsü mapang tongogo, ta ni bilemer," ta ashi.

Israel ketdangserisa, US, Canada aser European Union densema linük aikati Hamas ya kiralongrar telok ka ama nokdangogo, ta metetdaksü.

India dang Hamas telok nokdangtsü mepishiba dak sendakba nung Gilon-i, "Onoki yangi (Delhi) nung ketdangsertem den jembio. Onoki tesüiba mapang nunga kasa onük jembia liasü. Kiralongra ajanga

amokmerenji linük anapronglai (India-Israel) angateta lir. Nokdangtsü (Hamas nokdangtsü) tim ta onoki bilemer, kechiyong asenok ajaki kiralongra anema rarar," ta ashi.

"Parnoki amakba sülen onoki iba onük süok, aser maneni jembidar. Onoki India den jembidar. Kiralongra anema aser tanga asalentong onük aika nung onoki (Israel-India)-i ai-aura kaa bangjemer," ta paisa metetdaksü.

"Sangdong tejangja agütsür mezünpur lenirtem rongnung Ato kilonser Modi densema lir, Modi-i jangjangja kiralongra aitsüogo," ta Gilon-isa metetdaksü.

Qatar nung Indian Navy officer 8 nem tasüba obendang agütsü

New Delhi, Mongputeni/October 26 (Agencies): Brihostibarnü Qatar nung aliba court kati taoba mapang Indian Navy nung sepai 8 nem tasüba temerenshi obendang agütsüogo.

Parnok tiji tesüiba küm ka tashi Qatar nung aliba jail nung liasü.

India sorkari iba osang angashia aoksaba osang lemsatepba den külemi parnok kümzüksü atema sorkari akokba tashi legal tsütsü teyari lenmang bushitsü, ta metetdaksü.

Ministry of External Affairs (MEA)-i sangdong ka ajanga, "Tasüba temerenshi obendang agütsüba osang angashia onok aoksar aser iba obendang osang tejangja atar. Onoki parnok kibong züngsemtem aser legal team den tongtepratepdar. Onoki akokba tashi legal tsütsü nungi lenmang bushitsü," ta metetdaksü.

MEA-isa, "Onoki iba ken o ya kanga tongtibang ta züngshir aser iba tensa mita atar. Onoki maneni consular aser legal teyari agütsütsü. Onokisa Qatar nung ketdangsertem den iba obendang atema jembitsü," ta

metetdaksü. Ajisüaka MEA-i, iba ken o ya temai adoka jembitsüsa ken o ka masü, ta metetdaksü.

Yaküm August ita nung Qatar ketdangsertemi taoba mapang Indian Navy officer 8 ji pua liasü. Parnok Qatar nung aliba company ka nung inyakba mapang parnoki Israel nunger atema itdangitba mapa inyak, ta melung melemi parnok apu.

Taoba mapang Indian Navy officer 8 ji - Captain Navtej Singh Gill, Captain Birendra Kumar Verma, Captain Saurabh Vasisht, Commander Amit Nagpal, Commander Purnendu Tiwari, Commander Sugunakar Pakala, Commander Sanjeev Gupta aser Sailor Ragesh nunger lir.

Yaküm August 30 nü Qatar intelligence agency-i Doha nung parnok pua liasü.

Parnoki Qatar ketdangsertem dang bail nung chiochtsü aiben mepishi saka magizük. Qatar nung aliba Court of First Instance-i parnok nem tasüba temerenshi obendangji agütsü.

Qatar ketdangsertemi, India nungertemji anema parnok ket nung electronic kuli lir, ta shiogo.

Mehbooba Mufti maneni PDP Tir shimogo



October 26, 2023 nü Srinagar nung Peoples Democratic Party (PDP) senden amenba sülen tangokba noksa nung angur. Taoba mapang Jammu & Kashmir Chief Minister, Mehbooba Mufti maneni küm asem atema PDP Tir shimogo.

Srinagar, October 26 (Agencies): Taoba mapang Jammu & Kashmir chief minister aser PDP lenir, Mehbooba Mufti maneni party Tir shimogo; la ano maneni küm asem Tir inyaktsü.

Brihostibarnü Srinagar nung aliba PDP headquarters nung PDP senden nung People's Democratic Party

(PDP) general secretary, Ghulam Nabi Lone Hanjura-i Tir menden atema Mehbooba tenüng benoka liasü, iba sülen taoba mapang minister Abdul Gaffar Sofi-ia kasaji pusem.

Iba sülen electoral college nung züngsem ajaki voice vote ajanga la maneni Tir inyaktsü shim. Kasa election ji video link ka ajanga Jammu nunga agia liasü.

Lok Sabha Ethics Committee-i Oct 31 nü MP Mahua Moitra jaoker

New Delhi, October 26 (Agencies): 'Cash for Query' ken o dak sendakba nung Lok Sabha Ethics Committee-i October 31 nü TMC MP, Mahua Moitra jaokogo.

Iba committee nung tongti BJP MP, Vinod Sonkar-i, Mahua anema bushisüngdangba maparen nung committee-i home ministry aser IT ministry na dang teyari meshitsü, ta metetdaksü.

Brihostibarnü Lok Sabha Ethics Committee mezüngbuba senden mena "Cash for Query" ken o atema o lemtepba sülen la October 31 nü jaoktsü lemtet.

Senden nungjisa Parliament Ethics Committee nung

züngsemtemi, TMC MP Mahua Moitra anema benokba ken o ya süoki ia agitsü ken o ka lir, anungji committee-i iba ken o ya süoki ia agitsü ta bangjema liasü.

Brihostibarnep lawyer, Jai Anant Dehadrai aser BJP lenir, Nishikant Dubey na Ethics Committee matsüngdangi oa ken o lemsatepogo.

BJP MP, Nishikant Dubey-i Lok Sabha Speaker Om Birla den Dehadrai-i Moitra anema tai tongloktsüba documents lemsatep.

BJP lenir Dehadrai-i, businessman Darshan Hiranandani tenüng nung Mahua Moitra-i Lok Sabha

nung Adani Group aser Ato kilonser, Narendra Modi na anema tasüngdangba akaba atema lai sübokrem agiogo ta tai tonglokja lir; koba dang 'Cash for Query' ken o ajar.

Dubey-i, Dubai nung Moitra indang Parliamentary ID amshiba mapang nung labo India nung ang liasü aser National Informatics Centre (NIC)-ia iba osangji bushisüngdangba agencies den lemsatepogo, ta metetdaksü.

Ajisüaka Moitra-ibo, item ajakji tiyazü, ta shiogo.

Parliament nung Adani Group anema lai jembiba atema tang Adani Group-i la anema inyaker, ta Moitra-i metetdaksü.



October 26, 2023 nü Thiruvananthapuram nung Kerala Angh, Arif Mohammed Khan-i kaket ana- 'Adi Kailash' aser 'Drisyashringam' sayatsüdag tangokba noksa nung angur.

J&K kübok Kupwara nung kiralongrar 5 khaset

Srinagar, October 26 (Agencies): Jammu & Kashmir nung Kupwara district kübok Macchil nung aliba Line of Control (LoC) nung Lashkar-e-Tayyiba telok nungi kiralongrar pongu khasetogo, ta Brihostibarnü Kashmir Police-i metetdaksü.

Kashmir Police-i X ajanga, "KupwaraEncounterUpdate: Ano LeT kiralongrar pongu khasetogo (ajak senteper 05). Parnok maitüsü jangjatsü merangdar. Maneni

kiralongrartem mita odar. Ano maneni osang tejangja metetdaksütsü: ADGP Kashmir," ta lemsatep.

Indian Army indang Chinar Corps-ia X ajanga, "OP KUPWARA: October 26 nü Indian Army, Jammu & Kashmir Police aser Intelligence agencies senteper operation aoba mapang nung Kupwara sector kübok LoC nung arrtsü adena aittsü merangertem nokdangtetogo. Maneni mita odar," ta metetdaksü.



TIR YIMYIM YIMOBILEM (EDITORIAL)

DIMAPUR ROGONÜ, MONGPUTENI (OCTOBER) 27, 2023

Naga yimten telok 100 aküm atar ?

Naga yimten temeten asoshi taoba putu alima aso 20 buba tetenzüklen nungi Naga Club-i anir jembitsü tenzük aser iba yimten temeten o ji Naga National Council-i jepzuka bener küm 40 Naga nunger ka küma tebhong langer Naga yimten nüchiso asoshi timtem jenti aika raraogo. Iba mapang Naga nunger timtem, takoksa aser maksü majurudangba kibongbo kata malitsü. Atangji, tanü lanurtemibo süoki ia mebilemtsüa akok saka Naga yimten nüchiso mechi temeyong nung ajem janger timtemdaksüba, electric tashi agi rongga kangshiba, nisung taküm alilen tokolak ser sendaka yur mersü rongga menemdaksüba, asükwa aonung piyong tzü temekong nung ajungoka yutsüba, tetsüng temin nung süng aser longmi agi menüngba, khu bener merenshia jajadaksüba, alu aser kiojen ajak rongdoktsür yim ana asem külemi yim ka nung septepa yutsüba aser alui teka nung seal ajener odaksüba timtem reshikangshi ka mesüra ka majangshiba asen tsürabur ka danga malitsü. Atangji, item timtemji marem India telongjem kübok alitsü atema Nagaland state aküm, anungji yimten nüchiso melen state agizükba Naga National Council-ibo magizük. Ajisüaka, NNC leniba nung Naga nunger telongjem akanga meyuteti 1980 kümba NNC nungi razüka oa telok tasen ka tenüng agi NSCN aküm, ano küm tir lir külenbo NSCN telok ana küma lemsa, iba sülen NNC teloka aser NSCN teloka longjema meliteti kenü kati telok tasen ka, ano kati kenü telok tasen ka ta razüka opet oa oa tanübo Naga nunger yimten nüchiso bushir telok to kechi bushir telokar mejangjateti telok aika kümogo. Tajung kaji, iba amaji telok kwi aliar meshitettsüsa telok aika küma lemsar liaka, akhidang ama, azü tokshia raraba mali, Naga nunger rongnunga aser India dena yimjung nung lir. Aji oda, Naga yimten nüchiso bushiba tenüng nung telok kwi kümdir, India-ibo pelashishia agizüka parnok den yimjung yanglur. Ibaji Naga nunger asoshi tajung amai saka Naga nunger telongi alutsüba mapaji aji asütsü. Tang amaisa ora, ano asüng Naga yimten nüchiso bushir telok tasen akümtsü, ano yanüa ka tentettsü ta tanen maka oa oa 2030 nungbo Naga yimten nüchiso bushir telok 100 kümer alitsü aser item ajakji India-ibo akümketa agizüka yimjung ken o küm ka asoshi yanglutsü aser item telok 100 ji kar khen, kar khen ta Delhi nung oagi ano küm ka asoshi yimjung mapang atsülangtsü ta maneni oaya lia tanü NSCN aser NNC nung inyakertema aser asenoka iba lima ya toktsür oa adoktsü. Ibaji India taginüba lir. Ibaji kodang bilemdangdir, atangji küm 20 jakdang asen yimten lenirtemi Naga yimten tebilemtsü ken o ya India den len shitak nung jembia odar ta ayimoktsüba to, ya na (?) ta shisabolua bilemer. Tanü tia yabo asenok asoshi kanga takoksa, Nagaland-a merenloktet, Naga yimten nüchisoa mangu aser Naga yimten temeten otsübo amaadok ta asütsü. Joko, Naga yimten temeten indang masü saka sen, ali aser election onüktem indang asenok rongnung tejangraba jembir. Joko, alima nung tangar ita petinu nung alitsü atema inyaker, saka asenokbo alima nung kimung ka yong asenok temeten yokadoker. Joko, tangar alima kintembo küm ishika lir külenbo alima mekongdaksütsü asoshi ali telong nung akaba totzü mamshitsü asoshi küm telatet ka yur sentong tenzükogo, saka asenokbo yimten nüchiso ngur agitsü bilemba agi mamshitet yua lir. Yamai asenoka kopiga aotsü ? Joko, tang ano Christmas mapang ka arudarji, kari danga Naga yimten nüchiso bushir telok ajak ya ayongdena India den telemtetba ka agitsü merangtsüla. Aji mesüra, tatsüka lirbo, Naga yimten nüchiso bushirtem telok ya India tsüngdangbo tanurtemi sepai jilu aiba amai dang kümadoktsü.

OLEMSABANG

"ABAM 1986 Lemtet" OCET JANGJASHITSÜR

~ Molungkimong Mejensanger Putu Menden

&

~Molungkimong Literature Board

(Yashi adok nungi...)

Ano 1997 küm Molungyimsen nunger telok ka 125 Quasqui Centennial amongba nung "ABAM Executive Secretary Rev. L. Kari Longchar-shilem" agiba indang jembir. Rev. Kari Longchar shilem agibaji ABAM-i Official süa adentsü yokba sürabang ano kechiba Molungyimsen Arogo 1997 sülen küm pezü lir 2001 kum December 28-30 tashi 125 (QQC) Jubilee amongdang ABAM Executive Secretary Rev. O. Alem-i ABAM tenüng nung 'maneni' shilem agi? Süra, nenok Reverend trok-i Molungyimsen QQC 2001 küm ABAM-i shilem agia amongdang kechiba ola madok? Asü Molungyimsen Arogo QQC 1997 aser QQC 2001 anaben amongbaji tim asüba agi ola madok?

Nenoki yamai masüba tapak tapak züluba ajanga ken o tali tamajungba kümdaktsür aser temenen mapa tali jungkai adokdaksür. Ashiko, nenoki sign sür adokba ocet anaya nisung kar-i ocet renema bener arua signdakja lira tarutsü nung yamalaji mataloktsü tekümdangtsü lirko. Nenok Reverend ta asübaji onoki kanga metsünga reta akümtsübur saka alima yimden-yimli otsüren metongshiba aser lateta ayuba bangdak ka lir, item nung ken-o memenahtsü aser pei inyakyim nung mejimihtsü, aser tangari sang asoba (trap) nung mashihtsü shisadanga sarasadema inyakangma. Tanü putu tensa nung yimjung masü ochi nungdaker, kechiyong Yisu Khrista ya-a alimai yimjung adokdaksütsü kisüng atema aru masü saka temenen aser temeshi na tsüngta nok youka bendangtsü asoshi aru.

1981-1986 ABAM Special Committee ya parnok mensem pezüben amen. Parnoki Molungyimsen Arogo den dang amen ashi Molungkimong nunger bo kodanga maja, aser **one-sided report** ji 1986 mungdangi bener arua report agizüka ayu aser aji ABAM Resolution No. 40 aküm. 1986 ABAM Resolution No. 40 nung tangatetba ana agüja lir - (1) "Molungyimsen arogo Molungkimong yimdak December 23, 1872 nungji tenzük ta angateter." (2) **October 24, 1876 yabo yim tasen ka Molungyimsen akumba dang lir. December 23, 1872 nung tenzukba arogoji amangbapur yim tasen akumdangji bener ait.**" Iba tangatetba adokba tera (root) ya 1940 küm Molungyimsen Arogoi yamai langzüba angur: "Onoki bilumer, onok Arogo Molungyimchen tenzukba Arogoji lir" ta langzü. (Ref: 1960 ABAM Special Committee ABAM nokdakdak Renema akaba). Anungji, 1986 ABAM Resolution No. 40 nung **tangatetba** agütsüba dang kechiyong **missionary record kecha nunga Molungyimsen arogoji Molungkimong nung tenzük aser yim tasen akumdang bener ait ta mali.** Iba jagi dang 1986 Resolution No. 40 ya mungdang nung agizük saka **Tangatetba** dang agütsü. 1986 Resolution No. 40 nung **Lemtetbaji** bo iba ya dang: "Committee-i osang bener aruba ama Mungdangi agizüka ayu, aser iba ken-o nung Mungdangi kecha shilem (responsible) magitsü ta lemtet."

Anungji 1986 Resolution No. 40 ajanga 1980 Resolution No. 42 aser iba dak sendakba "1980 Special Committee tatempang terenem O" ajempangba mali, Kechiyong 1980 Mungdang Resolution No. 42 aser iba Special Committee Report 7th Nov. 1980 ya bo "tatempang terenem O" agütsüba lir. Saka 1986 Resolution No. 40 yabo **tangatetba** agütsüba dang, aser nungdakra kuli (document) bushiteptsu akok ta lir. Ashiko Dr. Clark record mesüra missionary record kar nung 'Molungyimsen arogoji Molungkimong nung tenzuk' aser 'yim tasen akumdang bener ait' ta nenok Reverend trok-i (6) nguteta lira 1986 Mungdang nung kuli (documents) bushiteptsu bo melaa lir. Ano nenoki 1986 reportji tanü tashi takum lir ta bilema lira, iba report nung Molungyimsen Arogo tenzükba küm 1872 amshitsü ta Mungdang lemtet mali. ABAM-ia (No. AB03A32/2015-16/112, Dt. Impur the 8th Nov. 2016) shity ajanga yamai metetdaksüogo: "Molungyimsen Baptist Arogo tenla ki nung Arogo tenzükba küm zülua akabaji ABAM-i temelaba agüja maka ta metetdaksür." Medensür, tanübo kuli aika nguteta aser tangatetba tasen ajanga 1986 Special Committee Report nung tashi mait ajitetogo. (1986 Lemtet nungya Molungkimong nung Mezüng Arogo tenzükba anogo tashi tai lir). 2016 küm **ABAM Temzüng 2016 (Revised) Temzüng Jeli O** nung "American Baptist Foreign Mission Ajanga mezüng Ao Naga Baptist Arogo 22nd December 1872, Molungkimong nung Dr. E.W. Clark-i tenzük" ta Mungdang nung agizüka yuogo.

Tanü Aor tashitemetertemia iba nung ya kechi ashir: Molungyimsen ano makumdang yongi Arogo Molungkimong nung 22 December 1872 nung tenzuk, aser 24 October 1876 Molungyimsen akumba anogo bener ayi? Tatem nung, Yisu Khrista ya Bethlehem nung aso, aji zülua lir ta ken atener aser jembir. Pa anogo 8 lir Bethlehem doktsür Jerusalem aser Nazareth-i aoba indang ji tongtipang masü, saka Yisü khrista kong aso aji tongtipang.

METONGSHITSÜR

Tir Yimyim adok October 26, 2023 nü Olemsabang tapak nung *1st Para line 9 nung "1896"* ta alibaji "1986" ta tazüngertemi melenshia züngdaksüner. Aibelenba atema sasar.

- Ocet zülur

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nicaragua sorkari Khristan putir 12 chiok saka Rome-i yokogo



Tawa Nicaragua sorkari Khristan putir 12 jail nungi chiokba sülen parnok senso temeden agiena Rome-i meindokogo. Putir 12 rongnung parnok 10 noksa nung angur.

October 26, 2023: Tawa Nicaragua sorkari ketdangsertemi Khristan putir 12 chiok saka Vatican den jembia parnok ajak Rome-i yokogo.

Yimtenren tsütsü putir ajakji tepuokdak yua liasü. Iba linük nung sorkar anema jembirtem aser aitsürtem kanga reshikangshir.

Taoba Bodhbarnü Nicaragua sorkari, Vatican den telatetba kar yangluba sülen putirtemji chiokogo saka parnok ajak Rome-i yokogo, ta metetdaksü.

Vatican nung press office director Matteo Bruni-i, putir 12 ji Italy nung aliba Rome Diocese indang kiojen nung lidaktsütsü, ta metetdaksü.

Iba dak sendakba nung Nicaragua nung Cardinal Leopoldo Brenes-ibo tang tashi nung osang kecha memetetdaksü.

Tawa chiokba putir 12 rongnungji parnok trokbo tan ita

nung ang apuba liasü. Khristan putirtem apuba sülen Organization of American States' Human Rights Council-i sorkar aitsüba den külemi yimtenren tsütsü nungi tepuokdak yua alir ajak chiokang, ta takhangba agüja liasü.

UK nung amenoka aliba Khristan melungtet telok, Christian Solidarity Worldwide (CSW)-i, tanünga putir trokjibo tepuokdak mapang talangka liasü, ta metetdaksü.

CSW nung Advocacy tongti, Anna Lee Stangl-i, putirtem chiokbaji Nicaragua sorkari mapa tajung ka inyakba ama asenoki mezüngshitsüla, ta metetdaksü.

Stangl-isa alima linüktem dang Nicaragua linük nung nüburtem temeden nokdangba atema Tir Daniel Ortega aser pai aniba sorkar aitsütsüla, ta metetdaksü.

Lai ashiba agi, putirtemji

mapang talangka tepuokdak timtemba sülen maneni linük nungi meindoker; iba dak alia parnok tepuokdak nungi chiokba atema parnok senso agienogo.

Taküm February ita nung Bishop Rolando Álvarez küm 26 tepuokdak ayutsü obendang agüja liasü saka tawa chiokba putirtem rongnung pabo densema mali, ta CSW-i metetdaksü.

Tamalen US sorkar den jembiba sülen tepuokdak nungi nisung 222 chioka US-i yok, ajisiüaka Bishop Álvarez-ibo US-i aotsü memelung. Iba sülen Nicaragua sorkari pa senso agiena liasü.

Tang pa La Modelo Tititapa jail nung puoka lir.

Yaküm August ita nung Álvarez 'house arrest' asü aser February ita nung Nicaragua senso agienba den külemi akümüli piyong atema pa temeden agienja liasü.

Hamas tamakok ajanga Isaia ainkari shinba ataloktsü: Netanyahu

October 26, 2023: Bodhbarnü (October 25) Israel Ato kilonser, Benjamin Netanyahu-i linük nüburtem den jembidang pai, kobi melii Israel sepaitem Gaza telungi ia amaktsü, ta metetdaksü dang Laishiba nung aliba shin o densema jembio.

Israel sepaitemi Gaza telungi ia amakba ajanga iba rara ano tamajungba akümütsü, ta aikati bilemba mapang nung Benjamin Netanyahu-i, linüki iba rara atema renema alitsüla, iba ya tesangwa aser tammang na tsünga tongbang asütsü, ta ashi.

"October 7 nü atalokba atema asenoki telangzüba agütsütsüla, ajisiüaka raraba sülen ang telangzüba agütsütsü," ta pai metetdaksü.

Hamas telok ya ISIS kiralongrartem den medemdanga Netanyahu-i, "Hamas züngsemtem ajak

süadoktsüla, ali tema nung alirtem, ali telung nung alirtem, Gaza telung nung aser Gaza tema nung alirtem (Hamas) ajak süadoktsüla. Hamas ya ISIS, aser ISIS ya Hamas," ta metetdaksü.

Ato kilonser, Netanyahu-i Israel aser Israel pusemertem ya tesangwa nüburtem, ta ashi.

"Luk 16:8 nung Yisu Khristai "tesangwa nüburtem" indang jembia lir. Asenok ya tesangwa nüburtem, aser parnok ya tammang nüburtem, aser tammang madak tesangwai takok angutsü," ta pai metetdaksü.

"Linük longjemtsüla, ibaji ajanga Yihuda nungertemi Isaia ainkari shinba atalokdaksütsü," ta pai metetdaksü.

"Isaia ainkari shinbaji asenoki atalokdaksütsü. Joko nenok arrtsütem nung mauiyatsü aser nenok süngkümtem nung sentsüwangshi alitsü.

Longjemer asenoki raratsü, longjemer asenoki takok angutsü," ta pai ashi.

Netanyahu-i jembiba o ya Isaia 60:18 nung ajemdaker jembiba o asütsüa akok. Iba Lai nung yamai shia lir, "Joko nenok lima nung rara indang osang mangashitsü, nenok arrtsülen teraksatsüba malitsü; nenoki nenok jaratem dang tekümtet ajatsü aser nenok süngkümtem dang tenüngsang ajatsü."

October 7, 2023 nungi tenzüka Israel aser Hamas kiralongrartem tsünga raraa arudar. Brihostibar tashi nung Isreal nung bendangertem densema nisung 1,400 dak tema süogo aser Gaza Strip nung nisung 7,028 süogo.

Brihostibarnü Gaza health ministry-i, Israel-i amakdang Gaza nung tanur 2,913 aser tetsür 1,709 densema Palestine nunger 7,028 süogo, ta metetdaksü.

ANOGO ABEN TSÜNGREM DEN

Asütsü Mulungba

(T.Ken 143: 1-12)

Kodang asenok timtem ajanga odir asenoki koda sarasademtsü? Asenoki Dawid sarasadem nung temepishiba kar angur, aser asenoki Pa tatishi nung ora, Tsüngremi asenok timtem ajanga asenok temoatsü dangi anitsü.

Mezüngbuba, pai ashi, "Kü sarasadem angang" (t.1), aser "Kü dang yakta langzüang, O Kibuba, kü nela lular" (t.7). Asenoki Tsüngrem dang ayimtentsü mali; asenoki Pa den O langteptsü mali. Asenok tongmelang agi Pa dangi aotsü aser ashitsü akok, "Kibuba, kü dang angang". Kodang tanur ka tebu mesüra tetsü dangi arudir, tsüraburi tenarong pa tsütsü lapoktsür. "Kibuba tenük temeshipur tsütsü lir, aser Pa tenarong parnoki ayimtenba nung lapoktsür" (T.Ken 34:15). Tanü na kechi agi shisabuludaktsür iba asoshi Kibuba dang sarasadem asü?

Dawid tanabuba temepishibaji, "Anepdang ne temeim yimlibilem kü nem angashidakjangma, kechiyong ni Ne dak amanger" (t.8). Ano, "Kü den jembidang, Kibuba" ta ashitsü akok. Anepdang shia Dawidi Kibuba O nung shisadang, aser Tsüngremi pa ani. Nai Laishiba azüngba nung mapang indokdarma aser iba züluri ne den jembidaktsüdar ma? Pai na aotsüba lemanng sayutsü.

Tasembuba Dawid temepishibaji, "Kü tsükchirtem nungi, O Kibuba ni kümzükanngma" (t.9). Tsüngremi asenoki jajatsüba lemanng nung jajara Pai ibaji inyaktsü akok. Tekong 10 nung Dawidi teyuba aser len anitsü asüngdang. "Nai mulungba inyaktsü kü dang sayuangma, kechiyong na Kü Tsüngrem lir; Ne tanela tajungi ni lenden lemanng nung anidakjangma". Pai ibaji inyaktsü koda mulunga lir!

Tatensa Dawidi ashi, "Ne tenüng atema, O Kibuba, kü taküm Kümzükanng" (t.11). Kechiba asenoki Tsüngremi asenok timtem nung anittdaktsünür? Atangji asenoki teyari aginür, saka ano asenoki Pa sentsüwangshi sädaktsütsüla. Pai sentsüwangshi ajak agizüktsü asoshi Pai asenok kümzüdaktsütsüla.

Na tetendangba ajanga aodang, Tsüngrem dang teyari asüngdang, Pai na timtem ajanga anitsü. Teti Pai teyuba nung alitsü mulunga liang. Tsüngremi Laishiba ajanga ne den jembitsü Pa dak amangang, aser Pai asenok asoshi kechi tajungtiba aji inyaktsü.

NSCN/GPRN-i October 31 nü National Prayer Day ayonger

Dimapur, Mongputeni/

October 26 (TYO): Ministry of Religious Affairs (MRA), NSCN/GPRN-i October 31, 2023 nü anepdang 7:00 ako nungi tenzüka Sumi Baptist Church, Purana Bazaar, Dimapur nung anogo ka Naga National Prayer Day ayongzüker, ta MIP, NSCN/GPRN-i sangdong ka ajanga metetdaksü.

Kilonser, MRA-i sangdong ka ajanga, Naga nunger nükjidong ataloktsü atema Naga linük aser lenirtemi Tsüngrem dang tatok meshitsü aser temoatsü meshia sarasademtsü kanga nüngdaka kümogo, ta metetdaksü.

Tamangtirtem aser counsellor temi iba sentong

ketdangsüa agitsü.

MRA-isa Dimapur district aser telongtet nung alir NSCN/GPRN kübok linük tenzükertem den külemi anasa aliba regions aser sub-regions nung linük tenzükertem dang lumitsü atema anepdang 7:00 ako tashi nung sentong agitsü aliba tesem atongtsü metetdaksü.

Organising committee-i iba sentong tembangba sülen shilem agir ajak chiyungdaksütsü.

MRA-isa Dimapur nungi kanga pilar aliba regions nung region caretakers/chairmen danga kasa anogo aser mapang nung pepei region nung kasa sentong ayongzüka agitsü metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Sasasasar

(adv) tejembinü nisung (cheerful person)

* Narolabo kanga sasasasar tejembinütsüka ajurur.

Sashi

(v) khu mesüra yangku lapoka bushi

* Sepaitemi kü khu ajak sashia toktsür ao.

OLONG PAITEP # 6677

Grid for crossword puzzle #6677 with numbered starting points 1-18.

TIPLÉN

- 1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S _ _ _ _ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. _ _ _ hi - (3)
16. Akümüli nungi pilar - (3)

OLONG PAITEP # 6676 TELANGZÜBA

TIPLÉN :

- 1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioiktsü,
5. Lenti, 7. Tajangzük, 11. teronem,
12. Sempa, 13. Jahaz.

NAI-A YA METETTER MA

Assam state nung Chief Minister talangtiba inyaksangji Tarun Gogoi liasü, pai 2001 nungi 2016 tashi Chief Minister inyak. Tarun Gogoi April 1, 936 nung aso aser November 23, 2020 nü alima nungi pila ao.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

I S Reddy Nallu Tripura Angh kümogo



Indra Sena Reddy Nallu, Brehostibarnü 20buba Tripura Angh mapa abentsü atema tenangzüktepba agiba noksa angur.

Agartala, Mongputeni/October 26 (Agencies): Telangana BJP lenir tejen Indra Sena Reddy Nallu Brehostibarnü 20buba Tripura Angh mapa abentsü atema tenangzüktepba agiogo.

Tenangzüktepba agiba sentong ya Agartala kübok Tripura Raj Bhawan nung agia liasü.

Pai Satyadeo Narian Arya ket nungi Tripura Angh mapa belenzükogo.

Nallu tenangzüktepba agiba sentong ya Tripura high court chief justice Aparesh Kumar Singh lenisüba nung agia liasü.

Tripura chief minister Dr Manik Saha aser cabinet minister tem, tongtiban

ketdangsürtem aser lenirtem iba sentong nung dena liasü.

Mapa agizükba sülen Nallu- i ashiba agi, "Tripura indang temzüng ozüng kümzüka ayutsü atema kü nem khuret agütsüogo aser aji ni inyaktüsü. Tripura nungertem tenzüksü atema maangka anguba atema ni pelar aser parnok terenlok asoshi teyari agütsütsü."

Mizoram: EC-i election mapang media indang shilem lemsatep

Aizawl, Mongputeni/October 26 (Agencies): Election commission-i taruba Mizoram election nung wadang balala nungi nüburtem timba nem vote agütsüdaktsütsü atema tongtibangsa inyakdar, ta ketdangsür tejen kati metetdaksü.

Menden 40 atema Mizoram assembly election November 7 nü agitsü aser vote December 3 nü azüngtsü.

Osangbenertem atema Aizawl nung anogo ka asoshi sensitisation workshop ka ayongzüka katsüba nung o jembiba mapang state additional chief electoral officer H. Lianzela-i, media sabang balala ajanga voter awareness prokshitsü atema Election Commission-i kanga tongbibangsa inyakdar.

Pai, workshop nung densema aliba osangbenertem dang electoral inyakyim aser nüburtem timbai vote agüja

election kecha tebandang makai sadem sadema yimjung nung agitettsü asoshi election department den teka amteper inyaksangshitsü ayongzüka liasü.

H. Lianzela-isa, media house tem dang osang kanga junga asadanger tejangja metetba sülenang sangdongtsü atema mepeshia metetdaksü.

Nüburtem nem takokba tashi tangazükba agütsütsü asoshi osangbenertem dang mepeshiba mapang ketdangsür yagi ashiba agi, Chief Electoral Officer (CEO) office-i, October 26 nungi November 6 nü tashi nung osang kakettem atema voters awareness dak sendakba nung tetoktepba ka ayongzüka agitsü.

Paisa, local osang kakettem dang November 6 aser 7 nü parnok indang yimo zülur tapak nung voters awareness dak rangloker osang agütsütsü mepeshia liasü.

Maneni Lianzela-i, voter

shirnok parnok indang constituency mesüra state adena orr lir parnok dang vote agütsüba anogo parnok temeden benschitsü atema mepeshia metetdaksüogo, kechiyong state sorkari November 7 nü ya public holiday ka sangdongogo, ta ashi.

CEO office media cell-i ayongzüka iba media workshop nung state kübok aliba osangbenertem aser media house balalai shilem agia liasü.


Sentong nung shisalen sayurtemji Dr. Lallawmkima, IPRO, Vanlalringa, Sr. Informatics Officer, H.Vanlalruatfeli, Programmer, CEO Office aser Zonun Sanga, Addl. SP, CID Crime nunger liasü aser parnoki media/social-media dak sendakba ken o tem, cVIGIL/KYC & Helpline apps, Suvidha & Candidate apps aser election mapang media dak sendakba nung aibelentem indang tangazükba agüja liasü.

Guwahati nung ano flyover 6 yanglutsü: Assam CM

Guwahati, Mongputeni/October 26 (Agencies): Assam Chief Minister Himanta Biswa Sarma-i, Guwahati nung flyover tasen trok yanglutsü ta Bodhbarnü metetdaksüogo. 'Shraddhanjali Setu,' flyover lapoktsüba sülen pai state sorkar indang sentongtem metetdakja liasü.

CM Sarma-i, X sabang ajanga iba flyover lapoktsüba indang video ka lemsatapa liasü. pai, "onoki Guwahati nung Shraddhanjali Flyover lapoktsüogo. Onoki yimti nung ring road ka densema iba amala mesükba flyover trok yanglutsü," ta ashi.

7.50m tulu lir.



Himanta Biswa Sarma

Km 2.28 talang Shraddhanjali Flyover ya sen 316 intoka yangluogo aser ita 19 nung renemogo. Flyover ya 2021 küm yangluo tenzü.

Flyover tasenba yagi gari senzusenpong tesadema kümdaktsütsü aser Guwahati nung alirtem nem anisüngzük agütsütsü. CM-isa, iba flyover yangluba ajanga gari anendaka timba kümdaktsüogo aser iba ajanga shishilembaba nunga tajangzük agütsütsü, ta ashi.

Maneni CM-i, nüburtem aser talisa flyover yangluba anasa alirtem dang sorkar den teka amteper inyakba atema kanga pelaba lemsatapa liasü.

US House Speaker inyaktsü Republican nungi Mike Johnson shimogo

Washington, Mongputeni/Oct. 26 (Agencies): Hopta asem atsütepa mapa meinyakteti aruba sülen US House of Representatives temi parnok indang speaker inyaktsü Republican telok nungi Mike Johnson shimogo.

Bodhbarnü vote 220 - 209 agüja congress nung kümsük asem buba inyaksang arishi küm 51 tain Johnson ya speaker mendeni aniket, koba sorkar shilem kar shibangtsü aliba paidoktsü mechi Democrats den tezüngzüktep kar agiba mechi hardline Republican telok tila kati October 3 nü Kevin McCarthy atsüngdokba sülen tzüng liasü.

Iba sülen House nung züngsem tera agi timba aliba Republican temi nübu asem asadanga arur Johnson ya shim, shiba Louisiana lawyer lir aser taoba tir Donald Trump-i yaria liasü.

"Pa speaker tajung ka asütsü südi ta ni bilemer," ta Trump-i New York court nung Bodhbarnü ashi, kong pai shishilempaba tsütsü tim masüba mapa inyak ta tai

tonglokja ken o jembir aser 2024 US tir election tokteptsü asoshi Republican telok nungi tejangja nübu ka lir.

Pa anema o tamajung kecha mangashi aser ajaki pa sabor, ta Trump-i ashi.

Johnson ya US congress nung züngsem ka ama 2016 küm mezüng shima liasü, anungji pa nübu kanga tejenbo masü. 2020 presidential election nung Trump-i tamakok ajuruba sülen Supreme Court dang iba election results melenshitsü ajungshiba House Republicans züngsem 126 rongnung pa ya züngsem tejangja ka liasü.

Külem tenzüker tem dangi shiti ka züluba nung 'overdue spending legislation' agizüksü nangzüker aser tang aliba funding November 17 nü tembangdang US sorkar meshibangtsüsa inyaktsü ta ashi.

Israel, Ukraine aser US border security atema Democrat nungi Tir Joe Biden-i sen billion \$106 indoktsü mepishiba nunga pai telangzüba agütsütsüla. Republican temi Israel aser US arütsü nung sen indoktsübo molunga lir saka

Ukraine maneni yaritsü atema parnok tsüngta telemsa adoka lir.

House nung lenirtemi timba fundraising aser vote azüngba nung rangloker, saka Johnson yabo conservative social positions asoshi inyaker nübu tejangja ka lir.

Pai tetsür aser tebur dak sendakba nung surgery agiba aser transgender teens atema hormone treatment nokdangba temzüng bhukumer, aeroplanes nung amener ajak mask agitsü ozüng agientsü milunger aser immigration aser abortion tenokdangba tali tesashiba kumdaktsüner.

House nunga Republican züngsem 221 aser Democrats züngsem 212 lir, anungji mangatettep aliba ken o nung vote agiteptsü sadema mali. Speaker asoshi candidates asem tashi benoka shimtsü merangba mapang party telungzüker nung telemsa adoka aliba ajitet. Steve Scalise, Jim Jordan aser Tom Emmer nungeri speaker indang 'gavel' amtsü vote 217 nüngdaka aliba mongutet.

Israe-i Gaza nung raraba ya Middle East alema aotsü akok: Putin

Kremlin, Mongputeni/Oct. 26 (Agencies): Israel-i Gaza nung raraba ya Middle East alema prokshia aotsü akok aser nisung kari mapa tamajung inyakba mechi Palestine nunger tai maket tetsür, tanur aser taintem tepsetba ya tai lir, ta Russia Tir Vladimir Putin-i ashi.

"Tanü asen teinyaktsü tongtipangtibaji azüdokshi anendaktsütsüba ya lir," ta Putin-i Kremlin nung Russia nunger tamangba yimsü balala nungi lenirtem den Bodhbarnü senden amendang ashi.

Taoba küm February ita nungi tenzüka kidanger Ukraine den tashi ajak amshia rara aruba nung lenir Putin-i ashiba agi, Israel mitkar temi Gaza amakba manenra rara tuluba akumtsü akok ta phone ajanga alima nung lenir balala dang shiogo.

"Rara tali tuluba akumba ajanga lendong timtem aser takoksa tulu alitsü. Aser Middle East region atema kisüng masü. Ibai Middle East indang arütsütem alema aotsü akok," ta pai ashi.

Pai West aija jembidang, tenüng maliba sepaitemi rara tuluba kumdaktsütsü meranger aser danga linüktem aser nübürtema akok tashi rara nung atsüoktsü meranger ta ashi.

Middle East nung kisüng masü saka arütsü alema oa rongrongshirong aser tesempatep adokdaktsütsü nükjidong nung lir. Iba atema parnoki nisung million aika indang linük aser tamangba yimsü nunga kongshitsü meranger, ta Putin-i ashi.

United Nations Security

Council ajanga Israel-Hamas rara atema pangzüng shidak yanglutsü atema maneni inyaktsüla, ta Kremlin-i Brehostibarnü ashi.

Teyari agütsütsü, civilian tem kumzüka ayutsü aser Gaza nung yimsü asüba Hamas telok aser danga telungpur nem nok-nü agütsüba anentsü asoshi ayongzüka United States-i pangzüng ka renemba Russia aser China nati magizükba (veto) sülen iba osang ya arur.

"Humanitarian pause' ya ceasefire den kasa masü ta diplomats temi ashir, koba UN Secretary-General Antonio Guterres-ia aginer. Ibai ghonda ishika dang alitsü akok.

Russia-i ceasefire tuluba atema UN nung benok, saka nüngdaka aliba ama vote tajemtiba mongutet.

"Asenoki ceasefire asoshi jembitsü nüngdaker aser asenoki telok kati inyakba kisüng maitsütsüla. Pangzüng ya ajaklen sako asütsüla aser tesendaktep tsütsü maneni meranga inyaktsüla," ta Kremlin odongtar Dmitry Peskov-i osangbener dang Brehostibarnü ashi.

Israel-ibo ceasefire aser humanitarian pause ya memolunger.

Bodhbar aonung Israel army temi "preparations for the next stages of combat" nung shilem ka ama ali nung tesem kar maka liasü.

Hamas-i October 7 nü Israel nung tesem kar amakdang nisung 1,400 shi tepsetba sülen Israel-i Gaza nung hopta asem jungnüa tayimtsü amshia

amakdang nisung 7,000 dak tema takum samaogo.

Israel nunger aser danga linük sensotem Hamas-i tepsetba asoshi Putin-i Bodhbarnü asükhu lemsatepa liasü.

Palestinian-Israeli ken o nung 'two-state solution' asoshi Moscow-i maneni inyaker aser ibaji ajanga teti asoshi tangatettep kati arutsü ta pai ashi.

Ajisüaka Hamas-i Israel nunger tepsetba mechi Israel-i Gaza nung bomb pokloksüba manenba ya tai lir ta ashi.

"Dangari mapa tamajung inyakba mechi tai maket nübürtem merenshitsü ya tim masü," ta Putin-i ashi.

Tang tashinung Israel sepaitemi tayimtsü amshia Gaza amakdang nisung aliba ki shilem 45 shi raksatsüogo, kaket reju 219 nung kongshiogo aser yangji UNRWA school 29 densema lir.

Gaza telungzüker nung nisung million 1.4 shi pei ki yutsür tesem balala nung jenoka lir.

Israel nungeri amakdang health personnel 101 takum samatsüogo aser 100 dak tema yirua lir. Kasa mapang ambulances 50 nung kongshiogo aser tesadang ka service magütsüteter.

Gaza north tsütsü mozüki 24 azüngtsütsü sangdonga lir aser mozüki balala nung shilem 150 agi tali nisung anepalur.

Kinü tanur 130 shi incubators nung metaloka lir aser electricity maliba ajanga parnok asütsü akok. Gaza nung anogoshi tanur 166 shi junga anepalu mesüi asor.

UNGMA ALIR IMERTETBA SEMCHIR ZÜNGSEM NUNGI ZÜNGDOKER TA SANGDONGER

Koridang li koba Imertetba semchir Chitensem chir aser Liden semchir indang arok kidong li lir, iba nungi aruba rongsen nung Chiten aser Liden semchiri tekoklak atentsü ta ashiba nung Imertetba semchiri yamaji kodanga benshia maru, anungji memelatsü ta nokdak. Ibayongji Chiten aser Liden semchiri tashiyim amshia Imertetba semchir dak azüng lalokja yimden nung atongsema alir Imertetba semchirtem sü indokja yimden nungi anentsü. Yamaji liyonga arudang Ungma Jenangsanger putu menden tasen ka tenzüksüsa mapang agi bener arutsü. Putu menden tasenba purtemi Imertetba semchirtema parnok rongnung atentsü aniok. October, 2023, nung nütsüng saru bendenba anogo tonga arudang Chiten aser Liden semchir nungi 3rd October anepdang tenyar yoka Imertetba semchir dang parnok nem tekolak metentsüra putu menden tasenba nungji atentsü makok ta o agütsü. Iba o ji angazüka 3rd October nungsa Imertetba semchirtem mensem ka lia telemetba agir Chiten aser Liden semchir dangi onük ana bener tenyar yok. Mezüngbuba o ji; "Onoki kodanga tekolak metentsütsü, joko asenok kidong balala kümogo, anungji nenoki onok nem nenok telemetbatem temetdaksü." Tanabuba o ji; "Koridang li nungji shir li nung shir atenar jangjatsü atema yimden saru bendenba anogo tembanger terok nü lir tenet nü buba nung asen tebou asem sanger Koridang li oboula lmsabang kimong nung ajurutepa Tsüngrem tsüngdang azüngashitepdi." Item o agütsüba sülen anogo ishika tsüngda nung Imertetba semchir rongnungi parnok ter asem (13) kin anema nokdaka Chiten aser Liden semchir dangi oa parnok tekolak tentsür tejenba menden nung yimden shilem agizüka tendi ta mepishi aser parnoki mepiba agizüka parnok yimden nung aniok. Iba osang angashia Imertetba semchirtem 15th October, 2023, nung mensem ka liasü. Kin anema apusortemjia mensem nungji jaok, saka parnoki marutsü ta osang agütsü. Anungji kini telemetba yamai sangdonger;

Parnok nübu ter asemi kin telemetba anema aoba dang masü, saka iba dak tematiba tetsü-teboui wazüka yutsüba yimli mezüngmeshi nung, parnokji Imertetba semchir züngsem nungi teti asoshi züngdoker. Parnokji kin nung kecha shilem maka. Koridang li nung Imertetba semchir shilem nung parnok kenyongi maten. Imertetba semchir züngsem nungi züngdokba nübu ter asemji itemi alitsü;

- | | |
|--------------------|------------------|
| 1. Imkongmeri | 7. Imnamayang |
| 2. K. Bendangtoshi | 8. Toshisangba |
| 3. Samalemba | 9. Takokümzüker |
| 4. Chungpongchiten | 10. Imnatongdang |
| 5. Taliyangba | 11. Limawati |
| 6. Artluin | 12. Puronen |
| | 13. Zülutemjen |

Kin nung tambortem :

Kin nung tambortem:

- | | | |
|---|---|--|
| 1. Tinunuken  | 2. Sakutemjen  | 3. Lanutoshi  |
| 4. Tinukumzuk  | 5. Imtinungsang  | |

SANGDONGER

Chuchuyimpang Mongoya Prayer Garden nung 27th to 29th October, 2023, anogo asem Healing Crusade sentong agitsü renema lir. Anungji nübür shirnok shi aser Tanela nung taneptsü aginüa ali, temulunger ajak arua Tsüngremer temoatsü agitsü pelashishia jaoker.

Tongtepratepdak - 9856486841 / 8258802047

Mapang - Aonung : 5:00PM
Anepdang : 9:00 AM
Anüngdang : 12:00 Noon
Sunday Devotional : 10:00 AM

US kübok Maine state nung nisung 22 shi tepset

Lewiston, Mongputeni/Oct. 26 (Agencies): United States northeast tsütsü Maine state nung prangbong bona alir kati tapi agi nisung dak injang khalokja aodang nisung 22 shi tepset aser 60 yirutsü.

Lewiston, Maine nung iba lendong ya Bodhbar nikongdang 7:00 ako meta tenzüka mezüng liasü. Tila tanurtem sentong ka agia aliba bowling alley ka nung nisung ka prangbong amer arua nisung dak injang khaloktsüba osang police temi angazüka liasü.

Mapang tatsüka lir anasa bar and grill nung injang khaloktsüba osang angazük. Ano nikongdang 8:00 ako sülen Walmart Distribution Center nunga injang khalokja liasü. Maneni

aonung 9:00 ako meta ano injang khaloktsüba osang aruba sülen jila tesem ajungalen siren ola agi asüng.

Iba lendong nung asürtem ya 16 aliba nungi 22 kumogo ta City Councilor Robert McCarthy-i ashi.

"Bowling alley nung nisung dak akhar jangjateta lir, nisung 22 asüba jangjaogo aser aika yiruogo," ta McCarthy-i ashi.

Police temi nübürtem dang kilong nung ki shibanger alitsü metetdaksüogo. Lewiston nung nisung 39,000 shi alir.

Lewiston Police Department ajanga parnok indang Facebook page nung Robert Card ta sür 'person of interest' nisung ka indang noksa lemsatepa liasü. (Maneni tapak 8 nung...)

26th Table Tennis Championship 2023 osang



26 buba Inter-District & State Table Tennis Championship 2023 yangi Multi-Purpose Sports Complex, Mokochung nung takok ngua tembanger külen asaya telemsa balala nung takoker aser tayongertem külemi tangokba noksa nung angur. Iba asayamung ya Nagaland Table Tennis Association aküm nung Mokochung District Table Tennis Association-i ayongzük. Nagaland kübok district ajunga nungi ama iba asayamung nung shilem agia liasü. (Mokochung, 26th October, 2023).

26TH INTER-DISTRICT & STATE TABLE TENNIS WINNERSHIP 2023

DATE: 23rd-26th October, 2023

RESULTS

I. TEAM EVENT

Mens Team

Winner Mon
Runners-Up Kohima

Womens Team

Winner Kohima
Runners-Up Niuland

II. OPENS

1. Mens Open

Mens (Singles)

Winner Ricky Hinglak
Runners-Up Visasier
Kevichusa

Mens (Doubles)

Winner Vickey Kumar & Ricky Hinglak
Runners-Up Seyievilie & Kelhouravi
Vivian Rutsa

2. Womens Open

Womens (Singles)

Winner Avitoli K
Yepthomi
Runners-Up Kesinuo
Dzuvichub

Womens (Doubles)

Winner Kesinuo

Dzuvichu & Thejavino Rio
Runners-Up Pekrusenuo
Yiese & Letsonuo Kire

3. Under 19 Boys

Boys (Singles)

Winner Ricky Hinglak
Runners-Up Mhasivi Miachieo

Boys (Doubles)

Winner Ricky Hinglak & David Hinglak
Runners-Up Mhasivi
Miachieo & Vilavoyuo Linyii

4. Under 19 Girls

Girls (Singles)

Winner Kesinuo Dzuvichu
Runners-Up Pekrusenuo Yiese

Girls (Doubles)

Winner Pekhrusenuo
Yiese & Letsonuo Kire
Runners-Up Tania Kachari & Elita A Sangtam

5. Under 15 Boys

Boys (Singles)

Winner Mhasivi Miachieo

Runners-Up David Hinglak

6. Under 15 Girls

Boys (Singles)

Winner Elita A Sangtam
Runners-Up Sangmaitola

7. Veterans 40+

Veterans (Singles)

Winner Kevirilie
Dzuvichu
Runners-Up Visasier
Kevichusa

8. Veterans 50+

Veterans (Singles)

Winner Dr. Juthsutho
Phoji
Runners-Up Tinumayang

9. Veterans Doubles

Winner Lhoulievi Belho & James Liezietsu
Runners-Up Vitho Neikha & Dr. Juthsutho Phoji

10. Mixed Doubles

Winner Ihubuing & Avitoli K
Yepthomi

Runners-Up Imsutongzuk & Satemmongla
Yaden

Asian Championships: India junior tetsür team-i gold angu

Mongputeni/October 26, 2023 (Agencies): India tetsür junior 10m air rifle team nung Sonam Uttam Maskar, Gautami Bhanot aser Jasmeen Kaur nungeri Brehostibarnü Changwon, Korea nung tang asaya aliba Asian Shooting Championships nung gold medal ka nguogo.

India team-i point 1891.6 ngua gold ngua liasü. Asaya nung Sonam-i point 632.6, Gautami-i 631.9 aser Jasleen-i point 627.1 ngua Asian junior record (1883.3) ajateta liasü, koba 2019 küm India tsürsa Mehuli Ghosh, Elavenil Valarivan aser Shreya Agarwal nungeri yanglur liasü.

Gautami-isa, kija asaya nung

point 251.3 ngua China tsür Jiao Ruoxuan (point 252.4) sülen silver medal ngua liasü. Iba asaya nung Sonam pezübuba nung liasü.

10m air rifle men's youth event nung Abhinav Choudhary-i point 241.8 ngua gold medal angu aser Priyanshu Yadav pezübuba nung tembanga liasü.

Tebur junior 10m air rifle event nung India team disqualify sütsü kechiyong team nungi asayar Dhanush Srikanth disqualify sütsü kechiyong pai International Shooting Sport Federations (ISSF)-i tetuyuba agütsüba ama shooting trouser mesemi liasü.

Team nung Dhanush, Abhinav Shaw aser

Umamahesh Maddineni nung densema liasü aser parnok disqualify mesütsü tsungda gold medal atema asaya liasü.

Kasa asaya kija asaya nung Abhinav Shaw-i point 227.6 ngua bronze medal ngua liasü.

10m air pistol women's youth final nung Urva Chaudhary-i (218.5) bronze medal angu. Iba asaya nung Kanishka Dagar aser Sanskriti Bana nati final-i ai saka pongububa aser trokbuba nung tembanga liasü.

Tebur 50m pistol event nung Ravinder Singh-i point 556 ngua silver medal angu aser team event nung Ravinder (556), Aniket Vinayak (534) aser Ram Babu (530) nungeri point 1620 ngua bronze medal ngua liasü.

Asian Para Games: India team-i medal 80 ngua otsü tasen yanglu

Mongputeni/October 26

151-149 agi koka gold medal (Agencies): India nunger para athletes temi Brehostibarnü otsü tasen ka yanglua Asian Para Games nung taküm medal timtiba ngutetogo. Parnoki gold medal 18 densema medal 80 nguogo.

India team-i 2018 küm Indonesia nung asayaba mapang medal 72 ngur liasü koba taküm asayartemi ajatetogo.

India nunger asayartemi iba asayamung anogo pezübuba tashi nung gold medal 18, silver 23 aser bronze medal 39 ngua lir.

Iba asayamung tembangtsü anogo ana anunga lia, India team-i medal 100 angutsü atema nukjidong yur aliba ajangtetsü imlar.

Brehostibarnü mezüngbuba Sachin Sarjerao Khilari-i, tebur F46 shot put nung gold medal ka angu. Pai yinlong 16.03m onteta iba asayamung indang otsü tasen ka yanglua liasü. Kasa asaya nung Rohit Kumar-i (14.56m) bronze medal angu.

Iba sülen para shooter Sidhartha Babu-i, R6 mixed 50m rifle prone SH1 event nung ano gold medal ka angu. Pai point 247.7 ngua liasü.

Maneni compound mixed team nung Sheetal Devi aser Rakesh Kumar nati final nung China nunger asayar Lin Yueshan aser Ai Xinliang na

151-149 agi koka gold medal nguogo.

Doubles W1 event nung India nunger archer Adil Mohamed Nazir Ansari aser Naveen Dalal nati Kazakh nunger asayar Nurshat Toleukassym aser Sagdat Duisembayev na 125-120 agi koka bronze medal nguogo.

Tetsür T12 100m aser tetsür F34 shot put nung Simran aser Bhagyashri Madhavrao Jadhav nati silver medal koka ngua liasü.

Ano Narayan Thakur-i, tebur T35 100m nung alizüng 14.37 seconds nung tongteta bronze medal ka nguogo.

Tebur T37 100m nunga Shreyansh Trivedi-i alizüng 12.24 seconds nung tongteta bronze medal angu.

Para badminton nung

Sukant Indukant Kadam (men's singles SL4), Sivan Nithya Sumathy (women's singles SH6), Manisha Ramadass (women's singles SU5), Mandeep Kaur/Manisha Ramadass (women's doubles SL3-SU5), Krishna Nagar/Sivarajan Solaimalai (men's doubles SH6) aser Pramod Bhagat/Sukant Indukant Kadam (men's doubles SL3-SL4) nungeri bronze medal nguogo.

Chess asaya nung Bhaveshkumar Rathi Himanshi-i tetsür kija standard VI-B1 event nung bronze medal ka ngua liasü.

US kübok Maine state nung... (Tapak 7 nungi...)

"CARD ya prangbong ashi. bena lir aser lendong aketba nisung ama züngshitsüla," ta parnoki zülu aser nüburtem dang pa den majuruteptsü aser anasai maotsü ashi.

"Card aliba jangjatetsü asoshi Maine state nung police officer noklang aikati bushisüngdang sütagi," ta Maine Public Safety Commissioner Mike Sauschuck-i osangbener senden ka nung ashi.

Card ya Maine nung aliba US army reserve training centre ka nung firearm instructor ama training agia lir saka ola angashiba densema mental health problems aliba otsü lir ta state police bulletin ajanga

Arishi küm 40 tain Card ya meyi mapang mental health facility ka nung hopta ana munga liasü ta ashi.

Police temi noksa ana prokshiba nung bangsemo keter long-sleeve tula temoru aser combat trousers tamang semer pa tabubang nung assault rifle bena liasü.

Lewiston ya Maine indang yimti tulutiba, Portland north tsütsü mile 35 shi pilar lir.

Tir Joe Biden nema iba osang agütsüogo aser pai Maine Governor Janet Mills, Senators Angus King aser Susan Collins aser Congressman Jared Golden nunger den phone ajanga jembio.

BILEMDANGANG

"Tenüngsang agütsüba agi nü anogotem süngdakjang."